

BAB V

KACINDEKAN, IMPLIKASI, JEUNG RÉKOMENDASI

5.1 Kacindekan

Dumasar kana hasil analisis jeung déskripsi data anu geus dipesék kalawan écés dina Bab IV, wacana humoris dina kontén *Youtube @Cangehgarr Official* nu dikumpulkeun dina 17 April 2020 diulik tina jihat sosiopragmatik. Tina 60 wacana humoris anu dikumpulkeun téh bisa dicindekkeun opat hal, nyaéta (1) wanda polah ucapan humoris, (2) fungsi polah ucapan humoris, (3) daya humoris, jeung (4) pola interaksi sosiopragmatik.

Kahiji, dina wacana kontén *Youtube @Cangehgarr Official* aya 3 wanda polah ucapan humoris, nyaéta (1) lakuning ucapan (lokusi), lakuning gawé (ilokusi), jeung lakuning rasa (perlokusi). Polah ucapan lakuning gawé (ilokusi) kaasup wacana humoris nu panglobana (39 polah ucapan humoris). Ieu hartina nuduhkeun kabiasaan pola nu dipaké pikeun interaksi maké komunikasi antar pribadi nu disempilan humor.

Kadua, dina wacana kontén *Youtube @Cangehgarr Official* kapanggih 4 fungsi humoris, nu ngawengku komisif, impositif, eksprésif, jeung asértif. Klasifikasi lobana fungsi asértif ku 60 polah ucapan humoris anu jadi gambaran loba pisan data hubunganana jeung bebeneran informasina sacara langsung.

Katilu, dina wacana kontén *Youtube @Cangehgarr Official* aya 10 daya humoris, nu ngawengku (1) métáfora réalistis, (2) métáfora déscriptif, (3) métáfora similatif, (4) métáfora kontrastif, (5) métáfora interprétatif, (6) métáfora sinonimi, (7) métáfora homonimi, (8) métáfora asimilasi, (9) métáfora pasalia, jeung (10) métáfora nyimpang (*plésétan*). 14 wacana humoris panglobana kapanggih dina métáfora nyimpang (*plésétan*), hartina humorna loba nu museur kana ungkara nu teu luyu jeung acuan mimiti.

Kaopat, dina wacana kontén *Youtube @Cangehgarr Official* kapanggih nyaéta rantayan ngaranté jeung rantayan meulit. Duanana pola interaksi dina wacana kontén *Youtube @Cangehgarr Official*, tapi nu leuwih mayoritas unggul ku rantayan ngaranté (35 wacana humoris). Hal ieu kaasup wajar lantaran ilaharna komunikasi lumangsung ku pola dua jalma nu proses gunem caturna tanya-jawab.

5.2 Implikasi

Tangtu baé hasil panalungtikan miharep bakal nambah jeung ngeuyeuban élmu pangaweruh dina widang kabasaan élmuning basa (lingistik), hususna kana pragmatik. Humoris dina masarakat Sunda geus jadi cicirén nu teu dipiboga batur, sabab kitu dina kahirupan sapopoé diilhaman bisa maca ieu panalungtikan pikeun mikapaham polah ucapan humoris nu mesék ku wanda polah ucapan, fungsi humoris, daya humoris, jeung pola interaksi sosiopragmatik dina kontén *Youtube* @Cangehgarr Official. Kiwari cangehgar kudu seungit deui, ku rarasaan loba hal pikaseurieun dina pola komunikasi nu luyu kana aspék-aspék humor.

5.3 Rékomendasi

Pamungkas dina ieu panalungtikan, sabada neuleuman hasil jeung analisis nu didadarkeun di luhur. Perlu ayana sababaraha rékoméndasi patali jeung ieu panalungtikan. Di antarana, ditataan saperti ieu di handap.

Kahiji, Obyék panalungtikan kana wacana humoris kontén *Youtube* @Cangehgarr Official réngsé diguar maké péso sosiopragmatik. Ku kituna dipiharep perlu ayana panalungtikan séjén make élmu téori anu lianna.

Kadua, Pamadegan ahli ngeunaan ulikan sosiopragmatik kawilang hésé pisan, perlu ayana lanjutan ahli dina nalungtik maké peso sosiopragmatik.